

Ils 4 da november 2015

Il Club Helvétique s'engascha per la concordanza

Cuss. fed. Eveline Widmer-Schlumpf è sa retratga dal Cussegl federal, il qual vegn elegì il proxim 9 da december. En lez connex evochesch'ins la « concordanza confederala » per giusitifitgar l'attribuziun d'ina segunda sedia a la PPS. Ma tge munta vairamain « concordanza »?*

Lezza fa part da l'identitad politica republicana creschida durant l'istorgia da la Svizra. Ella è ina cumpetenzza ch'il pievel svizzer ha acquistà successivamain, ina conquista che ha stimulà e stimulescha vinavant la coesiun ed il svilup da la Confederaziun. Nagin na metta quai en dumonda. Ma lunsch enturn pari ch'ins haja emblidà co ch'ins duaja encleger vairamain la concordanza e co ch'ins l'enclegeva propi il 2007, cur ch'ins n'ha betg reelegì in cusseglier federal.

En la cultura da concordanza reglesch'ins conflicts a moda concilianta, perquai che l'adversari politic vala sco represchentant legitim d'arguments e d'interess differents. La concordanza ha sa fida da proceduras che pretendan ed effectueschan ch'ins enconuschia bain tut las posiziuns. En ina democrazia da concordanza cumbatt'ins per ils megliers arguments, per raschunaivlezza. Ina democrazia cumpetitiva percuenter chaschunescha ina politica emoziunala da simbols ed ina pura politica da pussanza. La regenza federala e quellas da chantuns e vischnancas vivan il princip da collegialitad ; en ils parlaments promov'ins la cooperaziun da las differentas forzas.

La PPS appellescha adina a la tradiziun svizra, ma volva adina puspè il dies a la tradiziun da concordanz - e sincerescha il cuntrari. Ella ha pli gugent schliaziuns «puras». Cunter quai ha l'Assamblea federala mess in clar accent avant otg onns. Sche la PPS vul surpigliar responsabladad suenter ses success tar las davosas elecziuns, e sch'ella pretenda ina concordanza aifer il Cussegl federal, sto'la esser conscienta da quai ch'ina veritabla concordanza munta.

I na dependa betg mo da l'aritmética. Tschellas partidas e l'Assamblea federala ston regurdar la PPS e ses candidats al Cussegl federal ch'ina veritabla concordanza cumpiglia l'abilitad da far cumpromiss tar las personas che decidan.

Quai munta era che la PPS, sco la partida la pli ferma, ma senza maioritad absoluta, na po betg determinar sezza tgi che la represchenta en la regenza : la PPS sto surlaschar lezza tscherna a l'Assamblea federala. Ella sa referescha adina a la democrazia ; ella sto pia la respectar e renunziar a ses «artitgel Widmer-Schlumpf» anticonstituziunal, il qual stipulescha ch'ina persuna elegida en il Cussegl federal senza vegnir proponida da sia fracziun duaja vegnir sclausa da la partida sch'ella na renunzia betg a l'elecziun.

Da considerar tut spezialmain è che la concordanza na garantescha betg mo il success dal Cussegl federal. Ella renda las decisiuns politicas pli previsiblas e pli impegnativas e segirescha la pasch sociala. Quai sun las premissas da noss success economic. La concordanza è in trumf da la Svizra ; ins n'astga gist en temp grev betg la metter en dumonda.

* Il Club Helvétique ha publitgà il 2006 « Diesch tesas per il futur da la concordanza» (www.clubhelvetique.ch, rubrica «Thesen»).